



D GNIESSER 2020

Sujet:

Mer kaufen en Insle für alles Bööse und dien doo s Paradyys yylööse

Mer kaufen en Insle, nid die vo de Dääne
nid Grönland als strategische Punggt;
für gwissi Böösi, wo sich z fescht uuselääne
hätt ys Alcatraz vyyl besser dunggt.

Döört aane schigge miir die Bööse
uss Bolytigg und Induschtry;
kai roote Gnopf kasch döört usslööse
e Zruggwääg wird nid mööglig syy.

S rumoort und brennt uff dääre Wält
mit Populischte, Diggdatuure;
und maischtens goots um s groosse Gäld
die Heerre kömme erscht uff d Toure:

Dr Herrscher mit de Stars and Stripes,
dää mit em Mond und дәä mit Hammer;
ab uff d Insle! - mit Millioone Likes
wär d Wälterlöösigg und kai Jammer.

S git Häuptling mit Ego, die spiile gärn Lego
hänn Menschen und Bombe in dr Hand;
Machtgyyr und Kampf isch das gruusige Credo
und faare die ganzige Wält an d Wand.

Die kytschigg lute Patrioote
mit Drägg am Stägge allewyy,
dien iiri Gränze z fescht ussloote;
Impeachment für alli – salli! - wär s Zyy!

Voll verkalgggt und mit Thromboose
sitzt e Mängge in sym „Sessel“;
maint, är syg e ganz e Groosse
(Gfääss uff Änglisch daas haisst „vessel“)

Die Republygge mit Banaane
Bestächligkait und Korrubzioon,
fiere an s Verdäärben aane
E Rächts-Syschteem mit Null Funggzioon.

Missgunscht, Nyyd, Intoleranz,
Zerstöörigg, Grieg in corpore,
wiege sich im Doodedanz
mir wänn das alles nümmi seh!

D Lunge vo dr Äärde brennt
au doo goots nur um Fäld und Gäld;
Zerstöörigg puur, und me erkennt
glyy s Ändi vo dr gesunde Wält.

Au in dääre Stadt bisch nümme
sicher vor Zerstöörig, Gewalt;
d Hooligans in iirer Dümme
dräffe woorlig Jung und Alt.

Wo kunnt das Bööse numme häär?
Das uusezfinde isch nid schwäär:
Im Paradyys, s isch allne glaar
läbt friidlig unser Schöpfigsbaar.
Nur d Schlange zischt: «O Evalein,
da hängt ein pralles Öpfelein»!
Was isch dernoo so Schlimms bassiert?
D Eva, in Versuechig gfiert
het gässe die verbottni Frucht
und d Menschhait grissen in e Schlucht
ganz schnäll und mit eme lutte Gnall
bekannt als erschte Sündefall.
Und dä beriemti schööni Baum?
D Erkenntnis fäält, uss isch dr Draum!

D Verdryybig isch die schlimmi Folg
uns ka das uff kai Fall bassiere.
Erkenntnis! – haisst das Woort us Gold
zem ys DOO s Paradyys greiere.

Dr Wääg dä isch jetzt ändlig frei
mer könne wider lääbe!
Kai Krieg, kai Höll und au kai Gschrei
au kaini Röschtigrääbe.

Kai CO₂, kai Gletscherschmelze
kai roote Gnopf und au kai Gnall;
d Bolytigger nümme uff de Stelze
denn Hoochmuet kunnt jo vor em Fall.

Mer schaffen ys e Wält mit Friide
e Wält mit Freud und Harmonyy;
d Apokalypse isch verdriibe
mer döörfen aifach wider syy.

Mit Freud im Häärz und freiem Dängge
mit Wäärt wie Aastand und Reschbäggt,
ys geegesyts Verdraue schängge
ass unser Lääbe wider fäggt!

D Frau Fasnacht schänggt ys s Paradyys
für Pfyffer, Drummler, Bängg und Helge;
beglaltet ys ganz still und lyys
zem drey Dääg ändlig könne schwelge...

Schwelge kasch au an dr Ladäärenen-Uusstellig uff em Münschterblatz